

四庫全書

史部

欽定四庫全書

史部

雲南通志卷二十一之一

詳校官給事中臣李臺

刑部郎中臣許兆椿覆勘

總校官知縣臣楊懋珩

校對官中書臣張曾炳

謄錄監生臣餘中發

欽定四庫全書

雲南通志卷二十一之一

人物

鄉賢 孝義

忠烈 文學

宦蹟 隱逸

石蘊玉而山輝水懷珠而川媚人才之出邦國之光也夫十室之邑必有忠信矧滇南山水輿衍扶輿磅礴之氣篤生偉人漢唐以來如許淑盛覽之文學呂凱謝恕之忠節隗叔通段赤城之孝義較中區人士何多讓焉沿及元明尤多賢傑我

朝運際熙隆人才蔚起士之脩於家而獻於廷者蒸  
蒸日盛夫聚千百年瑰偉奇傑之英或馨香於俎  
豆或流馨於家邦載在志乘炳如也後之覽者毋  
亦有慨然而興起者乎志人物

鄉賢

雲南府

漢

許

淑善闡人元和中入中  
國受五經歸教鄉人

三國漢

孟

琰

朱提人建興間諸葛亮南征收用  
豪傑為官屬舉琰任至輔漢將軍

唐

王仁求

安寧人河東刺史平  
賦化民漢夷悅服

王善寶

仁求子以雲麾將軍持  
節河東諸軍事有治蹟

元

張景雲

字天祥中慶人優於理  
學能文章拔登仕郎

明

李忠

初名特昆明人洪武間選貢入監宣見便殿賞賚甚厚賜名忠登甲戌進士知鳳翔縣恩

威蕪濟有循吏風

尹葆

字士蓋昆明人永樂初鄉貢任會川教授有文行卒於官

段鑑

字至明昆明人永樂辛卯舉人宣德間知嘉定州斷獄如神陞惠州知府卒於官兩地立

祠祀之

李純

昆明人永樂甲午舉人調隴有智略正統間任御史巡按遼東功累著陞遼東巡撫後

改榆林尤有功績  
邊庭賴之卒於官

洪誠

字克敬昆明人少屬志行登永樂戊戌進士累官順慶知府所至皆以廉明稱

楊

景

安寧人事母孝中永樂癸卯舉人任霸州州判尋改澧州有誣吳姓盜其牛者牽牛歸吳

無以自明景疑其枉取牛縱之郊垌牛奔吳氏誣者服罪秩滿擢化州州同會峒夷亂攻城守將夜縋城以逃兵民不滿三百景激以大義皆願盡力乃撤故倉木蔽城缺又縛藁人披衣甲置城上有三人緣堞上擒斬以徇賊引去都督歐信贈景守忠二字而賓守將於法天順庚辰以老乞致仕自度官貧鄉遠因占籍巴陵以子太傅一清貴贈如其官

張

英

字時俊昆明人事母至孝中正統戊午解元入太學時祭酒李時勉以直言獲罪英忿且

恥乃同時大堅等詣闕請以身代遂蒙有名動京師是日即乞歸養學士商文毅輅贈以詩居鄉教授生徒卒年九十有四

黔國公沐琮禮重之

楊一清

字應寧號邃庵別號石淙安寧人天順間薦奇童為翰林秀才登成化壬辰進士歷官右

副都御史督理茶馬鹽政條上事宜多所匡濟比巡陝西脩復花馬池諸要害亭障固原告警單騎馳至瓦亭會總兵曹雄設伏備禦奉勅總制三邊經略河套條陳脩築增置防禦六事皆為劉瑾所格罷歸會安化王反於寧夏起用乃謂監軍張永曰寧夏事旦暮且有捷音但內變不測為可慮耳已而擒賊報果至張永驚服乃請竟內變之說一清取永手畫瑾字永悚息不敢任一清又密授永策永一如其言武宗乃收瑾戮之因召為戶部尚書加太子太保尋改吏部累至少傅入內閣嘗因災異自劾且言時事失宜朱寧等疾之乃謝病致仕嘉靖乙酉復起兵部尚書總督陝西冬召還內閣世宗待以腹心因大禮議不合致仕尋削籍後贈太傅諡文襄一清嘗自謂生於滇南長於湖

南老於江南故晚號三南居士卜居於京口丁卯  
橋猶不忘石淙因以為號李夢陽為之記稱其功  
著邇徵名顯社稷云所著闕中  
奏議獻納稿石淙等集行於世

趙

壁

字蘭完昆明人成化壬辰進士歷官郎中太  
監蔣宗誣奏南科後湖不法事行壁勘直之

宗遂奏壁黨科道左遷吉安府通判歷四川副  
使所至多善政後乞歸著茶花譜及詩文集

唐

瑤

昆明人成化乙未進士任刑部郎中持法不  
阿有客懷金夜入其門卻之亦不發於人後

致政歸號  
貞碩先生

傅

澄

字景深昆明人成化丁酉舉人任中江教諭  
歲饑捐俸為粥以濟貧窶人皆德之初無嗣

至是遂舉一子乃決意歸田以子給  
事中良弼貴贈如其官祀蜀名宦

李宗泗

字希顏昆明人。僦有智略。幼從父應官四川。籍於彭山。登成化辛丑進士。任池州府推

官。以廉能著績。陞南廣西道御史。有丰裁。時馬政多弊。宗泗一一肅清之。遷辰沅兵備道。又調山東僉事。弘治戊午。曲阜聖廟災。命重建。俾泗董其事。廟成。賜金幣。尋陞江西副使。會長河等洞賊。攻掠郡邑。泗出奇設伏。屢以捷聞。勞瘁得疾。卒於官。

李宗儒

字希雍。宗泗弟。幼穎悟。留心理學。登成化甲辰進士。丁父艱。哀毀骨立。廬墓三年。服闋。授

刑部主事。以平允稱。陞本部員外。兄宗泗以南臺御史入覲。同謁楊文忠。廷和皆目為令器。後卒於官。囊無餘物。惟退食漫吟遺稿一帙。

夏暹

字景升。左衛人。成化甲辰進士。歷官湖廣叅政。有廉名。陞苑馬寺卿。適值用兵。軍官以首

功數十歸還御之轉廣西左布政使卒於任  
孫較以歲貢任黔之畢節教諭三世皆清貧

吳九功

字時序昆明人弘治壬子舉人歷官山東僉事齊東歲饑貧民相聚為盜九功單車抵賊

巢諭以禍福皆感泣解  
散後卒於官立祠祀之

繆白

字元素呈貢人弘治乙卯舉人任成都府通判從征番寇嚴戒妄殺攝推官讞獄多雪冤

抑時有宋姓者豪俠不法白廉得之欲正其罪直指不可遂鬱鬱不樂仕進陞麻哈州知州即請歸  
事母曲盡色養林卧四十餘  
年以盛德稱及卒貧不能殮

陳淳

字唯素號澹齋呈貢人弘治辛酉舉人任太平府通判有疑獄淳立辯之其他善政及人

者多民用梅檀刻像以祀後掛冠歸里以詩自娛  
給諫傅良弼稱其未仕則富既仕而貧嚴於義利

明於出處至今鄉人言  
耆舊必稱澹齋先生

毛玉

字用成昆明人幼刻厲讀書母憂其銳恐致疾玉每夜輒以衣障燈初上春官不第僦居

燕市與四方名士講業十七年登弘治乙丑進士以脩孝宗實錄奉使滇黔訪求遺事歸報命授行人考選南禮科給事中值察典論劾四十餘人皆當陞戶科左給事中條上備禦諸策以憂歸服闋補吏科諫止巡幸居庸危詞慷慨武宗動色中貴由烏思藏往還沿途橫索御史林有年以論劾得罪下詔獄玉上疏極諫得寬旨嘉靖初大禮議起玉同毛紀毛澄等跪門哭諫世宗震怒被廷杖者數日卒燕士白衣冠相率送其喪為文輓之穆宗即位追贈光祿寺卿所存奏議十卷俱切中國是玉自幼孝於繼母終身無倦客人咸稱之

王

輔

昆明人言行不苟有古君子風中正德丁卯舉人知南部縣豈弟節儉稱循良吏子廷臣

克遵父訓以孝友聞仕至龍安府同知

朱

尹

號朗亭安寧人正德庚午舉人任崑山教諭陞國子監助教聲傾六館歷巴州知州多善

政歸里澹然寡營品概超逸

李資坤

字伯生昆陽人自幼以孝友聞中正德癸酉舉人知宜城嘉定二縣陞南刑部主事歷官

郎中出知銅仁府開渠堰均田賦撫平寇亂卓有賢聲考天下循吏第一所至皆有生祠竝崇祀名宦比歸置義塾不謁公府性剛介寡合言動以禮老而彌篤積書萬餘卷自號一蠹居士督學陳善採衆議檄

州立祠

羅

江

字孔殷嵩明人天性英敏弱冠登正德甲戌進士任建昌府推官直躬厲操抑折豪强卒

於官士民哀之  
祀名宦

胡廷祿

右衛人正德丁丑進士任南戶部郎中與呂涇野鄒東郭講究正學出為河南按察副使

會肅宗南巡渡河嬪舟後至逮督撫及廷祿俱削籍歸所居負郭足跡不至公門以篇什自娛顧應祥與同榜先後撫滇未嘗一見後遷秩去造廬促之不得已出見良久以果酒別於家所著書多散逸施光祿昱誅曰庚桑深居泄柳閉戶城闕如林竹松為伍

孫繼魯

字道甫昆明人少負奇質書史過目不忘登嘉靖癸未進士知澧州以他事避怒已者乞

為學官改國子監助教歷戶部郎中出知衛輝府未幾調淮安府中貴銜命督江南織造擅作威福

繼魯與之抗中貴怒譖訴於上逮至京執政為之  
解罪止調官既免弗謝調黎平府能以德化感格  
叛苗陞湖廣提學副使每從帖括相士數語盡其  
生平合若左券晉山西左叅政分守冀南繩宗人  
以法及陞本省按察使宗人數百要於路發其裝  
惟布袍敝履他無所蓄驚曰高皇帝以來罕見此  
官相與載酒偕士民追送之至任益飭法約束舍  
人子自宗潢以及百姓咸願久於其任尋晉右副  
都御史巡撫山西以邊事與總督翁萬達意不合  
為文誓於神慷慨忠義溢於言表因各陳所見交  
上封事時宰先萬達而後繼魯遂被誣下獄讀易  
賦詩矢死不折園中無措筆日用飯盃畫壁與同  
時得罪御史楊爵倡和百餘首名飯盃集知公者  
以百口直之而時宰怒不解竟以疽發卒獄中山  
西士民哭於長安者數百人穆宗即位從  
言官請贈兵部左侍郎諡清愍賜祭葬

張

素

字季文安寧人嘉靖癸未進士歷官湖廣兵備道出方略平賊陞四川巡撫復著軍功勅

賜金帛致仕歸里囊無餘蓄恬靜自如

陳常道

字子中呈貢人嘉靖丙戌進士知富順縣蠲鹽課賑荒民陞主事疏請終養服闋陞常德

知府屢辨疑獄運麻陽兵餉有功陞建昌兵備道乞歸杜門靜習手錄薛西園集參解多所獨得

施

昱

字子貞廣南衛人嘉靖丙戌進士任刑部主事陞員外典試山東取士多名雋陞本部郎

中以議國戚張延齡獄不稱旨落職時已陞陝西僉事矣家居八載起補貴州僉事威惠竝行士民繪像祝之瓦店驛峻嶺夾江甚難渡昱設法為巨橋覆以屋又因劾處得當欽賜銀幣值黔中大比錄文犯忌罪監臨御史波及之謫茶陵州州同歷永州府通判遷徽州府同知丁艱歸服除補大名

知府陞湖廣僉事駐承天府百務紛沓昱一意恤民不徇時好雖見忌疾弗顧也以擒巨寇李邦珍功賜綺幣晉光祿寺少卿卒於京昱孝友醇飭所著有禮經疑問藏於家

黃鳳翔

字冲霄號竹泉昆明人與其兄鳳翔少相師友登嘉靖丙戌進士任刑部郎尚風節出知

重慶府鯁直為當事所忌拂衣歸杜門不出著述甚富人問楊慎曰黃竹泉平平耳曰公勿言如竹泉者字內未易得也

段

纁

字朝聘昆明人嘉靖戊子舉人十上春官不第益發憤向學在京與周洞巖論慎獨之旨

謂本無寂靜惟動不失常者近是不得分靜存動察為二一時如謝高泉萬履庵皆與締交纁高自標植歸田後與胡廷祿遊胡雅意詩文纁曰志於道者恥為詩文胡即其居植衆卉曰借此以發生

意繡曰生意豈在彼也胡遂悟及胡卒繡誄之曰  
始待益於外來終取足於天則自是堅卧不出宦  
滇者造廬欲一見終不可得所居  
湫隘吁江羅汝芳題其里曰顏巷

李茂陽

字三山昆明人蚤喪父事母至孝與兄向陽  
讀書寒暑不少怠家窶甚司徒劉輔造訪贈

之金不受嘉靖甲午癸卯弟兄相繼舉於鄉茂陽  
授四川南充教諭士類多所成就遷知大足縣縣  
苦盜撫諭有方朞年盜遂息以直忤上官乞歸終  
養還里後杜門不出惟養親教子所著有歸來園  
集

余應桂

字夢徵昆明人幼孤事母孝中嘉靖丁酉舉  
人知灌縣保民如子採山大役報成而民不

擾蜀民頌之陞重慶府同知清戎理饑有能  
聲厯知南康府興學正俗均糧息盜入覲卒

周

斐

字公輔嵩明人嘉靖丁酉舉人任新蔡教諭攝汝陽縣篆救荒全活者衆歷知廬山彭縣

有惠政

楊秉和

字節甫昆明人嘉靖庚子舉人知臨漳縣卻金辯獄遷汝寧會宗府奪地自益疏聞下臺

臣久未決和慷慨啟王陳利害還所奪地以歸民時稱廉能歷刑部員外郎乞歸

石

銀

呈貢人嘉靖庚子舉人知合江縣遷隴州知州所至以豈弟稱不善事上官左遷韓府長

史乞歸隱於大漁村窮約終身晏如也

顧天祐

字吉甫昆明人嘉靖癸卯舉人知建始縣城介蠻峒歲比不登艱虞百端祐竭力保障招

集蠻黨綜覈隱占邊鄙寧謐遷保寧府通判捕大盜得其窟盜悉除致政歸杜門著書以經學授徒

卒年八十餘

嚴

清

字直甫後衛人弱冠登嘉靖甲辰進士知富順縣丁母憂服闋補邯鄲縣皆以廉能著微

為工部屯田主事陞郎中督建外城及九陵綜覈出入省費巨萬出知保定府時廷議選邊才清與馬厯陞四川右布政綜理摠節蜀庫獨贏隆慶初巡撫貴州復移四川一切公私費悉從減省奏改金錢當輸京師者二十餘萬就近抵陝西佐邊費定番僧貢額罷有司團操蜀民稱便萬歷乙亥再命巡撫貴州條理得宜苗蠻懾服累遷刑部尚書秉公持平屢白冤抑神宗素知清特授吏部尚書時癸未冬計事演委所擯斥雖閭里不少庇而引用嚴穴知名之士實多無何以勞瘁致疾四上疏乞歸又二年本兵乏人上特旨起清清力辭疏入上遲回久之乃許戊子特晉太子少傅歲給廩粟

輿夫卒贈太子太保賜祭葬諡恭肅清性檢飭有威儀生平操行尤嚴於取與辭受居官食廩衣敝與童僕同甘苦及為尚書亦然輿疾出都門遵潞河泝大江而行置石輕舟無慙古人歸滇後隱於松華別業後進造請惟以脩身務學為諄諄其詩隨意興成有冰玉堂集東阿子慎行刻筆塵載酒遺事方馮保以罪籍沒得一冊於其家定陵拔閱皆籍記朝貴往來事及書清無一字以此受知

郭

斗

字應秀昆明人嘉靖癸丑進士知孝感縣伸疑獄行取南戶科給事中以母憂去服闋補

山西按察副使覈郵符寬民力遷貴州按察使時安國亨搆殺罰粟而止平滇黔道塗以利行旅歷浙江左布政使致政歸萬厯初再起貴州尋歸田里構小樓於進耳山賦詩作書自適一夕方據案吟咏忽擲筆而卒

龍施

字德敷昆明人嘉靖乙卯解元歷官戶部郎中陞河東運同所在有政聲以母老請養家

居二十餘年澹然自樂著書之外治藥濟病視親戚有緩急輒損貲佐之所著有露林蟬嘯心濟醫

宗等

書

張

橋

字衡如昆明人嘉靖己未進士任工部主事管南旺開河刻意河防運道不滯竣事還京

擢寧夏兵備僉事急葺邊牆重罰剝軍者西賊為之捲幕尋以浮議罷歸精心墳典自六經子史旁

及真詮釋典靡不研究

才高學富尤精書法

朱運

字號蓮峯安寧人隆慶初恩貢任東昌府通判陞海北正提舉請告歸居鄉不入公府不置

田宅鄉

問重之

王

制

昆明人隆慶丁卯解元任思南府推官行取御史轉韶州僉事晉叅議操守清潔比歸好

義樂施歲歉賑饑鄉里德之

孫繼先

字志顯昆明人隆慶庚午舉人任興化教諭遷陀陵知縣奉檄紀驗臙舊招降賊屬三百

人朝廷賜金褒之再遷下石西州知州故為思明黃獠竊據弘治間始討平設流官率寄妻孥於太平府歲一履其地繼先始攜家居之闢草昧拓城甃井生聚教訓比於列郡遷承天府同知有築堤救荒之績後因事左遷荆王府長史歸以古禮倡邑人冠婚葬祭一軌於制人皆憚其嚴正

李聞馨

字德華昆陽人萬歷癸酉舉人知新繁縣奉檄覈倉儲持法不阿陞知茂州多惠政

張薰

字伯舜歸化人萬歷丙子舉人任河南教諭為督學楊俊民所器重歷大理司務陞刑部

郎獄無大小各當其情奉命獄囚三州多所平反每與直指使相左遂罷歸

王希堯

字惟中昆明人萬歷已卯舉人任竹山教諭

官以實心行實政後親老請歸孝養者十年每歲終以錢米濟鄉里貧乏

朱運昌

字際之昆明人萬歷庚辰進士任大理評事

陞刑部郎諫獄四川上錄因應縱者百餘人下司寇覆議悉當遷叅政分守川西條上錢穀盡一之制累遷福建左布政使中貴人銜命督稅多所沮抑中貴人欲陷之乃上書乞歸即日登舟當事挽留不得方抵里神宗特簡為右僉都御史巡撫福建凡闕疆場及民生吏治者所司未及狀達已被符令處分監司而下咸驚以為神奉約束惟謹撫閩前後幾年朝廷嘉其功待以異數尋卒於官賜諭祭

羅大器

號滄岳安寧人萬歷壬午舉人任山海關通判清屯選銳邊關倚重前後薦剡十上為權

貴所忌罷歸士民攀轅載道居鄉二十餘年復起用歷知岳州府丁繼母艱歸絕跡公門官司鄉里

皆推重之

劉文徵

字右吾昆明人萬歷癸未進士歷任紹興知府考清廡第一因漢劉寵為會稽太守以廉

潔著稱故民間有漢明二劉之謠累官太僕卿致仕歸里禮教甚嚴著作多傳於世前纂脩通志皆

其手筆也

朱思明

字用晦昆明人萬歷己丑進士授刑部主事署本部郎中適寧夏之變上怒逮及軍府重

臣思明掌其獄為具爰書國體獲全繼命欽恤廣東獄無冤滯累遷河南按察副使會大饑設法賑

濟全活甚衆開漳河十餘里開歸民感其德為建  
生祠陞本省右叅政管理河道時河決沒民居萬  
計歲漕不通恩明又倡開漳河二十餘里勞瘁無  
虛日閱四年始告竣陞廣西布政使宗人驕縱繩  
以禮法洎黎賊出沒官軍多濫殺冒功嘗詣獄清  
讞之釐剔鹽政積弊一清乞終養歸恬淡自怡足  
跡不入  
公府

孫光前

昆明人萬歷戊子舉人任宜良教諭陞國子  
監博士遷沅州知州沅當孔道官民苦於供

億光前力裁節之使客往來自為館餐州民以甦  
調嘉興府通判未幾歸僅以二鶴隨途中資罄竝  
鶴幣  
焉

朱化孚

號岱晟安寧人萬歷壬辰進士授行人主試  
貴州號得士遷兵部主事凡非尺籍什伍而

以虛名冒蠹者悉除之轉本部武選郎中條選法  
六事為後人遵守擢銀夏兵備道清錢糧謹斥埃  
轉貴州叅議止營兵之亂陞湖廣按察使刑罰清  
明告歸日與親友故人為文字會所著有賁幽吟  
陽城紀勝  
行於世

楊

鳳

字明正安寧人萬厯甲午舉人任順慶府通  
判攝府事賑饑全活甚衆遷知海州築堤過

潮以通鹽舶安插青兗飢民招集流亡給牛種墾  
田報陞南康府同知士民遮留得請在海十一年  
多異政繼為太原府同知擒妖定傾政績益著陞  
知順慶府值奢酋變助餉練兵賊不敢窺入覲引  
疾歸為人喜愠弗形鄉里皆重其德  
量後兩奉徵詔結廬慈山堅卧不出

范立朝

字二懷昆明人萬厯丁酉舉人任滎陽教諭  
歷陞刑部郎中獻獄無疑滯出知平涼府府

多宗人恣橫立朝每以法繩之共相服罪時韓王薨世子幼有嬖人子謀立幕夜賂以金立朝正色曰嫡庶之禮何可廢也拂衣而入王妃聞之亦以多金求為善計復奮然曰此公議何以私為使慚謝旋以忤給事某罷歸家居淡泊自甘遇後學必教以禮年八十卒

楊師程

字道南安寧人萬厯戊戌進士知湘陰縣多善政報最擢御史獻納糾彈指陳邊事巡鹽

河東清餘課豁商逋條議十數上咸報可母既薨三請終養未允而訃至號泣歸廬未幾卒師程慷慨有大志直節敢言一時重之所著疏草行於世

趙日亨

字貞所安寧人萬厯辛丑進士任太常博士選御史福藩之國中使躡丈膳田騷動連省

亨抗疏調畫得允山東歲饑民亂亨奉命巡按疏請蠲免撫綏底定時有監司恃婦翁為首輔行殊

不法亨劾之并及首輔由此外轉川南兵備道值  
奢酋叛募死士斬叛目黃光輝率兵解省城圍晉  
秩賜金卬雅皆有祠祀之會以病請門人張星曰  
師勲已勒岷峨樞撫在旦夕間何遽言歸也亨曰  
年來中外任事率植黨營私大亂將作每思匡救  
愧遐踪力微忍逐流乎遂以貴州左布政使致仕  
著寤歌樓集

施堯化

號泰維昆明人萬厯甲辰進士知湘潭縣有  
巨猾善邪術擒治之丁外艱服滿補長葛縣

地徧賦繁盡革羨耗以甦民困調光山廩得主盜  
者治之崔符以清俗多健訟片言折之即上司左  
右袒不徇也脩城池葺學宮不需時奏功民忘其  
勞擢吏部郎中悉心延訪善甄別轉驗封乞歸閑  
戶蕭然不  
至公府

劉鼎新

呈貢人為諸生時即存心利物鳳克發難邑中亂民有思揭竿應之者新倡義勇先發擒

之歲歉常減價出糶中萬厯已酉舉人知雙流縣值奢寅之變令縣民老弱婦女匿他所獨與丁壯居守賊至開門延入賊易之競入新率僮僕手刃二賊出伏兵與戰賊倉卒不知為計死者甚衆其後賊凡三攻城不克遁去新遂督鄉民援省城賊望其旗幟咸避之成都圍解以功陞叙州府同知監軍攻蘭州斬渠魁魯仲賢次集萬餘人以積勞卒於嘉州

董邦昌

昆明人萬厯已酉舉人知長壽縣多惠政陞貴州平越同知值黑苗叛薄興隆城邦昌多

方捍禦賴以保全陞知思恩府告歸遇丁亥流寇之難舉家自焚

傅宗龍

號括蒼昆明人萬厯庚戌進士知巴縣行取浙江巡鹽御史巡按貴州征安酋有功晉太

僕寺卿陞薊遼總督兵部侍郎轉戶部以諫忤旨  
罷職崇禎戊寅復起四川巡撫尋加兵部尚書又  
以言事下獄壬午總督陝西征流寇李自成屢  
破賊兵後軍潰被執守義不屈死之諡忠壯

夏

誥

字宗典昆明人貢生任教授自幼究心聖學  
意在化導愚民常以淨明忠孝倡為會而耳

食者以淨明二字毀之幾陷於罪幸見雪督  
學陳善素重之晚益精心性學稱竹牖先生

王錫家

祿豐人天啟壬戌進士累官詹事府正詹吏  
部左侍郎枚卜二次後予告歸里沙酋之亂

起義討賊被  
執不屈死之

趙

謨

昆明人天啟丁卯舉人性端方有勇力知龍  
泉縣有白蓮教倡亂盜賊蜂起苗蠻乘間作

亂謨率勇士剿平之撫順苗蠻又於上元夜設劇  
張燈誘賊入城密調勇士執銅錘擊殺之以卓異

擢御史崇禎甲申闖賊陷京師脅讓不屈罵賊而死

馬

乾

號洛水昆明人崇禎癸酉舉人任茂州知州

忠圖夔城凡二十餘日乾誓以死守申明大義感激人心親冒矢石隨機致勝督師閣部楊嗣昌援至賊敗遁庚辰擢川東道僉事陞四川巡撫甲申率師禦寇於內江孤軍援絕死之事聞贈兵部尚書

本朝

趙士英

字鵬望昆明人康熙丙戌進士選庶常事親以純孝聞季父無子英待之極盡誠敬丁亥

假歸甘貧自適庭戶蕭然有古賢士夫之風

曲靖府

漢

尹

珍

字道直牂牁郡毋斂人桓帝時自以生於荒

緯學成還鄉里教授於是南

域始知學後官至荊州刺史

三國漢

襲

習

建寧郡人諸葛亮平南中收其俊

傑為官屬習與焉官至領軍將軍

晉

謝

恕

字茂理牂牁郡毋斂人咸和間寧州為李壽

所破盡有南中地惟恕不從獨保郡城以事

晉官至撫夷中  
郎將寧州刺史

傅

寶

字紀圖牂牁郡平彝人仕至尚  
書郎安長令時號為南中人傑

明

陳

輕

字用昂曲靖衛人天順庚辰進士授刑部主  
事恤錄江南多所平反擢員外郎才猷茂著

尋按察福建兼兵備邵武值倭寇報警叱馭  
而行卒平倭亂丁外艱哀毀骨立忠孝篤至

張

璵

字廷璧平彝衛人成化己丑進士授南刑部  
主事歷貧外郎中以明允著出知重慶府弘

治初南贛閩廣夷寇為亂陞江西兵備副使治城  
池積糧糗練士卒脩器械設險隘建七縣城堡賊  
憚之不敢出後與當事論不合拂衣去盜復起兩  
廣都御史鄧廷瓚等奏南贛不可一日無璵特詔

留之遂築南康城賊聞風解散尋以疾辭歸璉剛正不阿盤錯立斷墨吏斂手比歸橐中蕭然

胡

潔

字汝清曲靖衛人正德戊辰進士知黃岡縣興賢剔蠹通水利農皆有成績擢監察御史

巡撫直隸浙江獎廉懲貪風裁凜然晉光祿寺卿尋以內艱歸徜徉山水詩文自娛每朔望必燕會

同宗以  
示敦睦

陶

廉

字介夫南寧人嘉靖己丑進士歷官九江知府所至有惠政卒於官祀吉安沅州名宦

唐時英

字子才南寧人嘉靖己丑進士知平陽縣問民疾苦均賦稅興水利陞戶部主事歷郎中

擘畫詳盡為大司農所器重出知真定府有水鏡之頌歷官陝西巡撫籌邊有功御書忠勞二字賜之致政歸置義莊周貧乏已則衣布茹淡卒予葬祭

莊自勉

字子貴南寧人隆慶間恩貢知德陽縣成都衛卒為其尉凌虐尉以事入德陽境衛卒潛

聚於仙人鎮欲殺尉縣捕兵救免尉告鎮民窩盜殺人縣令失覺察徹於臺司鎮民懼罪逃匿勉如不聞徐縛衛卒十餘人白其狀上下恬然民始復業軍興輓運時值審丁即照丁給米運之民以不擾居鄉尤多德行後以南昌府通判致仕

謝得申

字芳洲曲靖衛人萬曆壬辰進士任順慶府推官有直聲撫按以銓諫薦命甫下病卒

朱世昌

字章義曲靖衛人萬曆辛丑進士知舒城縣有政聲陞兵禮二部主事致仕居鄉建桂香

閻魁星閣  
鑄文昌像

朱家民

字同人南寧人萬曆丙午舉人會試副榜知涪州陞潮州知府著有政聲遷貴州監軍道

副使劉安賊建城十七座復創盤江鐵索橋人免  
病涉尋陞布政使屢著治行及平寇有功特進一  
品服廕二子世襲指揮歸里節儉好義篤於鄉黨  
更置府會館於省城脩萬卷樓積書凡有志之士  
皆養於其中  
人咸頌之

馬夢箕

尋甸人萬厯己酉舉人知羅定州  
陞常德知府立身清介鄉人欽之

莊大化

南寧人萬厯己酉舉人知邕縣秉性清介自  
月俸外未嘗取民一錢火耗贖鍰痛加革除

署清如水至晨炊不繼晏如也六載考滿陞王府  
審理貧無以治裝士民斂金以贈力卻之留滯岳  
陽三載訓  
蒙自給

臨安府

明

弄

甥

元土官普提之後洪武初大軍南下弄甥率衆夷首先歸附太祖嘉之使世襲寧州土官

既蒞任政先撫字能通下情凡州治皆其脩創

楊

鈞

字大用寧州人元末任威楚通判後避地景東明師南征鈞勸土官歸款潁國公傅友德

上其績除通政司知事歷官戶部郎中陞雲南土官叅議劉三吾稱其在官以忠居家以孝云

張文禮

字用中寧州人志尚卓磊登永樂甲申進士疏陳不習吏事乞就學職授雲南府教授勤

於課士尋乞歸居鄉訓徒名士皆出其門臨安甲科自文禮始

張

海

字克寬寧州人選貢宣德間任揚州府推官有異政正統間擢河南道御史奉勅視閩案

贖適延平賊鄧茂七作亂海會兵討平之陞貴州按察使值苗民作亂按轡撫綏全省以安卒祀貴

州名  
宦

李

旺 河西人正統辛酉舉人知戎縣初蒞任土賊猖獗躬率衆擒之歿於陣事聞贈叙州府通

判賜勅褒廕有司立祠祀之

張 隆

字伯興建水人正統間監生任杭州府知事以廉能薦歷陞本府知府有濬湖築堤功入覲治行為天下第一天順間丁母憂歸廬於墓側有狐兔馴伏之異人以為孝感云

張 西銘

字希載寧州人海之子幼穎異博學登成化乙未進士知金谿縣縣多豪猾下車致其尤者庭誨之人皆感化會撫州饑諸屬杞鼓數起獨金谿人相戒勿為盜縣有虎及蝗為文禱於神患

遂息以治行擢河南道御史巡按遼東治城塹核軍實再按蘇松發粟賑荒全活甚衆後督學畿輔士類傾心著有鶴軒集

羅

珦

字用誠臨安衛人成化戊戌進士任刑部郎中出知桂林府時西延陽洞諸蠻出劫興全

珦徽州縣簡練民兵潛扼山口躡殺幾盡諸蠻斂跡

王

杲

字啟昭臨安衛人成化辛丑進士知中江縣鄒智稱其清慎勤賦三事堂詩以美之正德

初陞四川叅議政績懋著祀蜀名宦

王

璟

字明仲建水人幼聰敏為諸生時粵人張某謫戍臨安比放歸常妻為資相別慟甚璟遇

之為贖其妻與同歸後登弘治庚戌進士知懷寧縣興學治水以最聞正德初徵為御史時逆瑾擅

權璟抗疏力詆朝中以真御史目之後巡按四川清戎伍之籍改瞿塘之路以邵武知府致仕歸居

鄉禮讓

樂親之

張

繹

字思紹建水人弘治丙辰進士知南溪縣擒劇賊韓積德勘永寧納溪軍民爭殺積案人

咸心服陞四川僉事藍賊之亂多所招降添柏林遞運減巴州解銀官民稱便以貴州兵備副使致政歸著有東

巖錄諸稿

李文中

字宗周臨安衛人弘治甲子舉人歷任吏部主事綜理精詳陞禮部員外以議禮廷杖出

為四川僉事整肅風紀賊寇秦相周天星倡亂奉命撫剿悉平之歷固原兵備道致仕

劉

洙

字道源新安所人正德戊辰進士歷官都給事中在諫垣十三年以蹇諤著名諫武宗遊

政五事肅宗端治本七事又請改新安所之地革十八寨之兵劾兵道王昊之非法薦臨安府朱疏之庶能時議建家塾

繆宗周

號碌碌通海人正德辛巳進士任戶部主事以議大禮廷杖後官至浙江左布政使所至

有宦績里居三十餘年絕跡公門清約如寒士

楊

僎

號肅菴臨安衛人嘉靖丙戌進士官吏科給事中疏靖難諸忠節事留中不報時論多之

仕至叅議居鄉以德行稱

紀經綸

字肫夫建水人純樸不妄言鄉里稱為篤行君子嘗市一婢貌頗異問之曰父為百戶曾

立功以貧迫至此遂養為已女厚嫁之弟有癩疾愛護甚至中嘉靖甲午舉人知新都縣編縣馬以

濟驛因再補上蔡縣開金梁渠以興民利計擒劇賊黑龍黑虎黑象等歷陞鄖陽府通判襄藩長史志操無愧前哲

萬文彩

字國華臨安衛人嘉靖戊戌進士知富順成安兩縣老成練達祛弊節冗擢南戶科給事中彈劾不避權貴疏禦堵馬市皆切中邊計出為貴州叅議賑賑飢民擒妖賊陞四川威茂兵備道退吐蕃之寇邊賴以安告歸淡泊無營日娛書史年九十而卒

吳希賢

字進夫建水人父早喪事母以孝聞母病瘵希賢盡讀方書和藥跪進親持溲穢年餘竟不起時祖母在堂慮傷其心承順備至有叔早逝撫其孤女厚嫁之所造就門人擢高科者數十人

中嘉靖丙午舉人知渠縣誘擒劇寇刁七輩荏苒帖然性狷介不隨俗步趨當事中以深文罷歸居

鄉怙退和易口不言人過而有過者惟恐其知焉

許

鉞

字國器石屏人嘉靖乙丑進士累官監察御史時諫官詹仰庇斃於廷杖人懼權璫莫敢

近鉞伏其屍大哭上聞之乃命收葬出為江西副使剛方自持與巡按不合遂致仕歸

王恩民

字成宇建水人隆慶戊辰進士知永川縣有循聲召試御史轉湖廣荆西右叅議時崔家

坪巨寇嘯聚往來荆門一帶無寧日思民至廬寇踪跡除殲無遺人有再造之感後值故相張居正以父喪歸一時監司俱屈為趨奉恩民獨投刺迎謁弔賻如常儀張意不悅恩民竟登舟去張後諷湖廣御史論之調貴州叅議尋遷副使時有夷寇突至城下挾取在獄罪囚人情震動恩民徐取紙筆分布官兵開城出擊賊遂退撫按合疏薦其才器可用之九邊會以憂歸服闋補官厯福建左布

政晉巡撫右副都御史致仕歸優  
游林壑淡泊自甘年八十六卒

黃立中

字訥膺建水人隆慶庚午舉人知資縣適楊應龍奉調遣引兵過其縣前驅者直入其庭

立中縛之龍聞止不入訴於軍府右司馬徐元泰時成都知府耿定力亟稱其賢徐遂檄應龍速發兵自是愈加約束他邑賴焉事平應龍不敢復經其地後遷嶺西通判卒

蕭崇業

字允脩建水人隆慶辛未進士識度宏遠生平無疾言遽色選庶常改兵科給事中厯戶

工二垣先後封事數十上禁侈靡開泐河劾欺弊其調驛傳疏中有云一命半通誰非王臣而膳宰不致餼司里不授館非所以體羣臣也且立法峻則持久難請自今定職名填實數勿使下掠美而上不見德一時咸是其言以為得大體奉使冊封琉球歸報命陞兵科都給事中厯官南京都察院右

食都御史以養母  
告歸尋卒賜祭葬

譚繼統

字宗道建水人萬厯己卯舉人與邑見捷友  
善共為詩文倡和任元氏教諭陞國子監助

教為祭酒李廷機所重陞刑部主事尋改工部遷  
貴州副使卻獨山蒙氏水西安氏餽金剿平野寇

阿包  
等

塗時相

字揆字石屏人萬厯庚辰進士任戶部主事  
有廉聲陞大名知府置常平倉遍給牛種在

任五年所轄州縣積粟至數十萬朝議推為廉能  
第一神宗賜鑑歷官南京太僕少卿閣臣張位薦  
其方正敏達尋以病告歸家居時巡撫陳用賓以  
征伐議加稅充兵餉相上書力爭語甚激切天啟  
辛酉山東道御史陳九疇刑部尚書陸光祖奏相  
常平倉政績請為直省郡縣式詔令頒行天下所

著有仕學膚言養蒙圖記

包見捷

字汝鈍建水人幼穎異八歲時太守試以對句及七言詩應口而成登萬厯己丑進士選

庶常為焦竑董其昌所推重改禮戶兩科給事中時遣中貴分出採金榷稅每中旨出輒力諫章凡十餘上中有云開礦之害陛下謂徒取諸山澤在礦使實奪取之民間搥擊入山者十二載虎犀出柙者半天下詞意激切上震怒謫貴州布政司都事癸丑召入為戶部主事遷尚寶卿尋晉太僕寺卿在朝公卿以捷熟於典憲輒就諮詢多所匡濟出為江西巡撫戢宗人練軍實甄流品政績愈著特簡吏部左侍郎明年入京護喪之慶陵病卒贈工部尚書賜祭葬

陳

鑑

字虛白石屏人萬厯丁未進士任刑部郎中出知廣西梧州府遷左江道副使厯官廩正

有聲見璫禍起致仕歸念環屏多賊土城非久遠計慨捐多金改建磚石後賊起攻城不克人賴以全

張法孔

字南魯寧州人性孝母卒血出柩隙跪而舐之登萬歷庚戌進士授戶部郎中提督建昌

學道歷四川左布政清操絕倫報擢刺銀三十萬以助兵餉後致仕歸脩學繕城蜀藩特疏薦之以太常寺少卿取用為天下清官最

趙琦

字景韓寧州人萬歷庚戌進士任工部磚廠員外積弊俱清陶戶戴德奉勅巡歷山東累

官大名知府東省邪教猖獗琦預選丁壯繕器械城池未幾盜起賴以得全改知保定府刑清政簡卒於官殯殮不辦巡撫遣吏資賻大學士孫承宗以狀聞欽命馳驛歸葬入大名保定名宦

王士昌

字心泰寧州人崇禎癸酉舉人知泌陽縣時

臨城率民兵并所募壯士夜擣賊營獻忠引遁逾數月賊復攻救兵不至城陷士昌冠服懷印正坐堂上罵賊而死特贈光祿寺少卿

本朝

劉彪

字玉菴建水人天性孝友丁亥流寇破臨安其弟被掠彪以身易弟歸養母流離黔蜀者

數年

張覺

寧州人幼失父事母至孝偶得異疾夢神救之曰有趙某者孝子第一汝居第二疾遂瘳

後禮部旌表孝子

楊慶

臨安衛人兄春永樂間從征交趾陣亡慶代兄子行訛言慶亦亡母痛喪明踰年慶歸遍

求名醫罔效乃齋沐禱於北辰為母舐目久之復明

董紹舒

曹叢人嘉靖間應歲貢入京至道中目眩心驚乃曰吾母思我遂歸絕意仕進比母終哀

號幾絕操行高潔足不入公門

張廷作

蒙自人嘉靖間土賊逼城劫殺其兄廷佩廷作見兄危急向前救之俱被殺奉旨建死義

坊

紀元

字調甫建水人萬歷間貢生父良卒於軍母李氏孀居有廢疾三年艱於動履元與妻郝

氏晝夜敬事不怠母病癰危甚元為跪吮而愈人稱誠孝所感

楊世春

阿迷人事母孝母死廬墓三年鄉人稱為楊孝子

戴天資

河西人母林氏目瞽跪而舐之雙目復明

張任晟

建水人生員少孤貧母孀弟幼晟篤於孝友養母教弟兩弟皆成名尤選於易郡人以易

起家者多出其門

包萬化

臨安衛人生員事親色養備至及歿哀毀幾絕祭必涕泣尤好周人之急以子見捷貴贈

如其官

龔朝傑

建水人生員事親孝親歿哀毀盡禮鄉里稱之

許網

通海人家貧負薪養母僅有一子一日夫婦往田母瞽目攜其子忽墜井中及歸竟不哭

子惟寬慰其  
母孝養有加

趙文宿

阿迷人性純孝菽水承歡終身不怠勅賜天下孝子第一

姚思敬

建水人父母病衣不解帶躬視湯藥田宅財貨推讓其弟卒之日其妻洪氏不食踰旬而死

死

萬容

石屏人都指揮中長子性孝友事父及繼母能先意承志篤愛二弟推賢不取尤好文學

儒者  
重之

馮敬

字允恭建水人幼失怙恃事兄政克盡恭謹食必同席兄有疾湯藥必親致之

趙臨大

嶧嶧人生員明末野賊劫掠負母逃賊欲殺其母臨大哀求願以身代賊憐之獲免其子

善慶亦  
以孝聞

### 本朝

王敬德

蒙自人生員聘段氏值流寇封氏耳鼻氏父以廢疾辭婚敬德不從卒娶之後生子六人

謝正

石屏人前明貢生好義推誠素為鄉里所重康熙乙巳土酋龍韜叛攻城正倡義散財率

鄉人竭力固守城賴以安

許邦相

石屏人生員事父母色養並至親歿喪葬一遵家禮廬墓三年墓下忽湧清泉范學使題

其泉曰孝感系以詩云青山數行淚古木一谿烟萬歲千秋後人思孝感泉

張良伍

字葆璠石屏人貢生吳逆叛強授以官毀形自匿誠諸子混跡漁樵不入城市大師復

滇授霑益學正以母老乞養課訓子孫皆有家法年八十而卒

楊

培

阿迷人貢生堅守臣節不事吳逆大師復滇授河西教諭陞開化教授振興文教告歸

置義田以贍親族鄉人德之

董

玘

通海人康熙庚辰進士官檢討假歸養母孝謹備至後母歿以哀毀卒

房

書

石屏人康熙戊子舉人幼失父事孀母先意承志及母歿以哀毀廬墓致疾卒

陳國琬

建水人幼瞽習星命術養親生事死葬皆如禮弟國琰早卒子幼撫如已子其妹亦寡琬

贍之終身

蘇弘名

石屏人好施與尤篤於宗族捐貲建先祠置祭田數百畝春秋禴祀所餘為族人代納丁

差至

李占春

字載陽郡人幼孤事兄伯春如父撫姪無異已出居鄉以仁厚稱由歲貢任香山訓導納

一妾年幼春曰此吾女輩不可犯也贈金遣之遷仁化教諭建尊經閣疏泮池以德化諸生又時濟

其貧乏者崇禎間奉旨入仁化名宦

李士龍

字化之郡人坦直端方事後母孝讓祖業與弟好學能文一時諸生半出其門以歲貢官

上海主簿委治河渠有成績民立慕禹堂肖像以祀海盜掠大姓捕獲訊治剖決明敏署縣事尤稱

清介士民德之

比歸行李蕭然

楊繩武

字念爾彌勒人偉貌洪聲兼資文武登崇禎辛未進士選庶常授監察御史巡鹽河東浚

鹽池完逋課歲饑設粥濟民全活甚衆妖賊以白蓮教聚衆捕獲首惡其黨立解巡按河南土賊郭三海衆至數萬率兵擒之截殺流寇不敢犯境遂自河南回京條陳數事召對平臺稱旨擢僉都御史巡撫順天駐遵化時流寇猖獗懷宗以剿賊任之晉兵部侍郎總督薊遼軍務賜尚方劍繩武治兵有法汎地無虞復命旋京會松山告警廷推赴援再令督師繩武時病劇輿疾行至豐潤卒上聞震悼贈光祿大夫太子少傅兵部尚書予祭葬廕一子世襲錦衣千戶

元江府

元

哈

繳

徹里路總管初行省都元帥舒魯杰諭以大義賽感慕遂備珍貢增差賦置驛傳比於諸

路

托迪

元江路安撫使大德五年從征八百有功陞元江路總管勇鷺過人部夷畏服時洞蛟為孽代挾利劍入洞頃之水盡赤代與蛟俱死蛟患息沿河始得耕種民感其德每歲祀以中牢

明

施大節

郡人永樂丁酉舉人知交趾演州慈愛廉明宣德丁未黎利陷諒江府大節嘆曰豺狼不

可厭也繕甲兵積糧餉為守禦計賊逼城下力屈死之

本朝

曹一彬

新平人康熙乙巳土酋祿益反圍新平執彬令誘開城彬入率民兵固守賊攻之不克城

得全後叙功旌曰赤  
心全城力鞏金湯

東川府

明

普合

土人以廢補知府撫  
字有方夷人信服

昭通府

明

阿普

土人元末任總管洪武中率  
衆歸附招隣酋効順授知府

大理府

漢

盛

覽

字長通，樸榆人。元狩間，從學於司馬相如。所著賦，有賦心四卷，相如答書云：「詞賦者，合纂組」

以成文，列錦繡而為質，一經一緯，一宮一商，此賦之迹也。賦家之心，苞括宇宙，總覽人物，斯乃得之

於內，不可得而傳。覽與張叔開、迤西文章之始。

張

叔

樸榆人。天姿穎異，過目成誦。元狩間，聞司馬相如至，若水負笈從之，受經歸教其鄉人。

晉

龐

遺

樸榆人。咸和二年，李特據蜀，李雄寇建寧，遺起義兵攻雄，走之。

唐

段宗勝

南詔清平官獅子國伐緬緬求援於南詔宗勝救之勝知南詔主老子世隆幼權臣楊苴

顛恣擅恐其篡奪因請重其事權得專生殺許之乃限七日齊軍於河尾惟統矢失期立斬其將即苴顛子也既入緬敗獅子兵緬王酌以金寶不受惟取佛舍利歸至騰越聞南詔主死苴顛篡立宗勝與苴顛書曰王崩子幼聞公攝位國家之福曩援緬獅子國不戰而潰緬王酌我佛舍利宜率國人迎之境上苴顛得書服龍衣執金爐陳儀衛出迎舍利甫下拜宗勝即斬之歸國求世隆立焉

宋

高昇泰

大理國人段氏臣保德侯高智昇子也段氏子孫不振國人推戴立之在位二年疾篤謂

其子泰明曰段氏中廢國人推我不得已而從之今其子已長可還彼故物後人母效尤也泰明遵

遺言求段正淳立之改號  
曰後理國而段氏復興

李紫琮

大理國人其主段和譽命為進奉使入貢於  
宋過湖南見學校文物之盛請於押伴求詣

學瞻拜聖像邵州守張察許之遂  
遍謁諸生又乞觀御書舉笏叩首

元

段福段

日

先世為大理國王憲宗朝世祖南  
征誅其臣高泰祥仍以段興智主

國事乙卯興智與其季父福入觀詔賜金符使歸  
國丙辰獻地圖請悉平諸部竝條奏治民立賦之  
法憲宗大喜賜興智名摩訶羅嵯命悉主諸蠻焚  
燹等部以福領其軍興智遂以國委任福與弟日  
率焚燹軍二萬為前鋒導大將兀良合台討平諸  
郡攻降交趾入貢興智道卒中統二年段日入觀

世祖復賜虎符詔領大理善闡威楚統矢會川建  
昌騰越等城自萬戶以下皆受節制至元元年合  
利畏結威楚統矢善闡及三十七部諸蠻叛善闡  
屯守官告急日率衆進討大破之於威楚復遣李  
羅攻賊於統矢城遂定統矢其秋舍利畏又以衆  
十萬謀攻大理詔日討之師至安寧擊敗舍利畏  
遂復善闡定新興進攻石城皆下之蠻部平三年  
日入覲錄功賜金銀衣服鞍勒兵器十一年賽典  
赤更定諸路名號以日為大理總管未幾舍利畏  
復叛日遣石買等詭為商旅執贄往見挺矛撞殺  
之梟首於市復賜金及金織紋衣於是置郡縣署  
守令行賦役施政化與中州等十三年緬國擁象  
騎數萬掠金齒南甸欲襲大理日領騎兵千人禦  
之以功授大理蒙化等處宣撫使十八年與其子  
阿慶入覲帝嘉其忠勤晉大理威楚金齒等處宣  
慰使都元帥留阿慶宿衛東宮陞辭復拜為雲南

諸路行中書省叅知政事十九年詔迎征緬師至  
金齒卒子阿慶襲爵累授鎮國上將軍大理金齒  
等處宣慰使都元帥佩金  
虎符段日一作信苴日

陳

惠

大理國人段氏臣至正間明玉珍攻善闡梁  
王奔威楚召段功救援功與珍戰謀得珍母  
書令珍成功乃還功更其詞思得人以致珍惠願  
往功難之惠曰吾以一身救萬人當不負但有母  
在耳功曰迎爾母家吾家膳吾膳無憂也惠遂持  
書往珍得書默然揮之出惠歸言狀功知珍必夜  
遁追及敗之復追至七星關  
大勝而返功欲官惠惠不受

楊

昇

太和人豁達超邁經史無通至正間歷官木  
邦徵江鶴慶知事以討明玉珍功陞木邦路  
同知卒子寶為大理路通事以招諭土人授姚安  
路判官從征克蔚州曹州陞大理路土官治中梁

王構兵寶曰兩國相圖民有供餉鋒鏑之苦極力解和土人深感其德

明

楊

禧

太和人永樂辛卯舉人任榮經教諭上書言

史遷知慶遠府以誠信化民任滿將行民遮道泣留臺臣上其事復留三年又將行民又留如初乃以叅政行府事歷十二年實授叅政遂乞歸特晉右布政使

趙

彥

趙州人宣德壬子舉人知高縣仁恕廉能百廢具舉郡守忌而陷之削籍後四年芒部作

亂筠珙諸夷望風從之招撫弗聽惟曰趙尹來即降於是辟彥彥至單騎往諭果降論功復任卒於官

杜

亨

字時泰太和人天順庚辰進士累官黎平知府所至以慈祥稱始為諸生勤學鄉試第一

從諸父遊宦洪洞識邑人韓尚書文於童子中大器之授以經及亨歸里韓為雲南布政使禮遇甚篤其孫韓偉復持節按部至郡躬求亨墓以文祭之

戴

仁

太和人成化甲午舉人累官鎮遠知府舊例有羨稅四千餘金為交際需前守以入私橐

日增稅額商賈患之仁至編稅為三百六十兩以足一年經費餘悉裁罷亦不白於當道人或勸之曰彰己之長形人之短非吾心也陞松茂兵備道歸里不治第館賓於門設榻於屏自號無懷先生卒之日家無餘財郡守吳晟涕泣而殮葬之

包文偉

太和人成化丁酉舉人性嚴毅里中後進多從受業鄉試對閣宦策屬詞峻厲間以為詈

已恨甚尋授呈貢教諭一日聞以他事召而辱之  
偉正色厲聲聞氣沮揖而遣之平居手不釋卷嘗  
製藥餌作橋

梁以利濟人

李

華

字子實大理衛人成化戊戌進士知密雲縣  
陞太僕寺丞出知程蕃府不赴遂歸里優游

如野老未嘗干人卒  
之日貨其居以殮

趙

弼

字廷直太和人成化辛丑進士知邯鄲縣以  
約已推誠為治陞太僕寺丞守官益謹致政

歸田躬執耒耜嬰跣泥濘中晏然自適同榜姚祥  
來為監司訪諸田間問生事何寡對曰差勝諸生  
時矣有女不得於壻忽暴死壻家恐不知所  
措弼至謂壻曰死生命也其寬厚類如此

張

敏

太和人成化癸卯舉人累  
官至叅政平蜀寇以功顯

楊 鵬

號敬菴太和人弘治己酉舉人任黃州府通判以廉明稱後歸里四十餘年無老少皆稱

長者所著有南詔通紀壽至百歲

李 素

雲南縣人弘治乙卯舉人知射洪縣卓異擢御史歷江西僉事所著有南崖奏議春秋心

訣行於世

張 鳳羽

字拱宸太和人弘治戊午舉人任鄧都教諭士貧不能婚葬者隨力助之歲饑作粥賑濟

遷知資陽縣明於斷獄知潼川州值威茂張遊擊死吐蕃之難捧檄往勘排浮議而白其忠里中稱

為玉山先生

楊南金

字本重鄧川人弘治己未進士知泰和縣民有三不動之謠以刁惡財力權豪也擢御史

值劉瑾亂政其黨為總憲凌轢諸御史金曰不做此官便了豈可屈於權奸乎遂拂衣歸即日行二百里瑾聞追之不及除其籍嘉靖間詔起耆舊授湖廣僉事晉江西叅議以老歸年八十卒鄉里傳之

趙

儀

號春汀太和人弘治辛酉舉人任應天府推官多所平反累官知州在涪在瀘多惠政皆

祀名宦生平以不欺自命往回萬里不借一馬一力於官其清介如此

周

臣

字蓋菴雲南縣人正德丁丑進士知公安縣性狷介改常德府教授陞國子監助教致仕

杜門讀書手不停披所著有翼聖傳及春秋心傳蓋菴雜稿

楊士雲

字從龍太和人正德丁丑進士選庶常改給事中以病辭歸環堵蕭然手不釋卷與昆弟

極友愛鄉里婚喪教以節儉一軌於禮著有皇極天文律呂咏史諸集

屠

蠻

雲南縣人正德間知江夏縣以忤中使調蘆山縣會天全蠻長攻城屠戮蠻受令剿捕俘其衆復所侵故地境內以寧及去邑人悲號流涕為建祠置田報祀焉

李元陽

字仁甫太和人嘉靖丙戌進士選庶常會詔出翰林習吏事乃知江陰縣有循良績召

為御史遇事敢言如止輦承天詰奸東朝等事一時推重巡按閩中懲墨吏禮文學薦舉耆逸林富馬鳴衡等扈駕承天遂知荊州府築堤捍江民皆德之尋罷歸家居四十年精研理學著心性圖說與羅念菴王龍溪等相印可年九十無疾而終所著有中谿漫稿艷雪臺詩等書行於世

鄒堯臣

號和峯趙州人嘉靖丙戌進士選御史歷官叅政所至以治行稱丁艱歸遂不出設義田

立家塾宗族德之

趙汝濂

字敦夫太和人嘉靖壬辰進士選庶常轉考功主事京察時總憲欲調某御史濂曰考察

摘過不宜斥無過之官及上疏趙文華在黜中家宰以文華為內閣所倚信不欲黜濂曰文華不黜則無可黜之官矣其剛直不阿如此晚擢副都御史侃諤有大臣風節致仕家居敦內行不置產業營一草庵匾曰覺真推俸與親族共之

高

對

太和人嘉靖乙未進士任行人陞監察御史視鹺兩浙巡按八閩風裁凜然豪強斂跡以

直忤時論州倅歷叅議政尚整肅清操始終如一後告歸麗江土司以重幣乞言卻而不許

李東

字震甫太和人隆慶辛未進士知際莊縣成都有親王租稅地諸宗人常與邑民爭畔結

訟官多掣肘又臺司郡長往來應酌民疲奔命東  
視事期月種種治辦彭縣有子殺父獄當事鄭重  
不敢決命東往讞盡得逆狀當事猶不決會恤刑  
部使取囚復驗忽暴雷殛囚死人益頌其神明灌  
口有茶山藩邸人侵界牟利久不能決東身履其  
地博訪獨斷遂成定案召為御史諸所論劾皆屬  
大奸奉命督修乾清宮羣閣奉約東上嘉其功賜  
金幣丁母憂歸服闋巡按廣西肅吏平獄時有寨  
夷之警粵撫意在用兵東曰小醜不足煩斧鉞議  
主招降果解散及得代遂乞身引退抵家益事閤  
修崇尚正學有詔搜括遺直廷議推之復御史未  
幾擢南光祿少卿連章請老隱於點蒼山麓趙用  
賢謂震甫文宗愚溪詩法少  
陵理學師白沙咸得其秘

史旌賢

雲南縣人萬厯庚辰進士知內江縣有賢聲  
擢監察御史侍經筵歷七省副使致仕著述

甚富

李嗣善

太和人東之子萬厯辛卯舉人知閬中縣治行卓越入知宛平縣有馮進朝者玉熙宮近

侍也其門下王祿有細過進朝捷之立斃事發案驗得實付法曹行縣覆覈進朝直入縣堂喧罵不已嗣善叱左右執而杖之付獄將上胥吏陰入進朝金嗣善白京兆尹褫其役進朝不勝幽苦益行賄謀以狀聞謂縣令小臣榜掠近侍誣指生辟且請與嗣善共對簿而大璫又為進朝地人人危之臺諫言進朝罪狀顯白令執法固當於是法司始議嗣善奪俸不報後改奪職一級調外任而進朝止擬罰白粲始奉俞旨嗣善以外調遂不復仕後召為南戶部主事出權武林闕未幾卒

姬文華

雲南縣人少以孝行聞萬厯辛卯舉人知應山縣陞睢州知府歷官皆著賢能及居里耿

介不阿鄉  
人稱之

艾自脩 鄧川人萬厯庚子舉人任湖廣知州性孝友  
丁艱歸廬墓六載手植松柏地溢孝泉應聘

講學奉旨旌曰當代名儒其兄自新  
以選貢入成均卒業亦為理學宗望

熊俊臣 雲南縣人貢生萬厯間任瑞州訓導陞羅  
次教諭宅衷正直立教有方瑞州祀名宦

曾高捷 字雲馭賓川人崇禎庚辰進士累官吏部驗  
封司員外致仕歸山居讀書精求性命之學

生平慷慨好施至老不倦丁亥流寇  
入滇脅之以官抗節不屈年八十卒

## 本朝

施大成 雲龍人貢生康熙乙酉任廣西府訓導性誠  
篤孝謹不苟言笑少時父遇賊欲殺之大成

呼號奔救引頸求代賦感悟父子俱獲免晚年益  
達心理學精闡大易訓示後學多所成就年九十  
卒

### 楚雄府

### 宋

高量成

段氏臣世居威楚代高泰運為相遣使由廣  
南求內附後退居威楚能恤孤寡老幼風俗

化之稱夷  
中君子

### 明

何

鑑

楚雄縣人善事繼母以孝聞正德庚午舉人  
任涪州學正為冢宰夏邦謨所重遷知永川

縣有惠政後歸居鄉親戚貧不能嫁娶者捐貲助之更置田以贍宗族

何漸遠

楚雄縣人鑑之于恩貢生知蒼溪縣縣有蠶桑之利歲獻令若干曰樣絲遠罷之歲饑設

粥賑濟後告歸仗義樂施資助婚喪建橋利涉父子世濟其美

宋

鈺

楚雄縣人正德癸酉舉人任蘄水教諭科條嚴密衣食貧士擢知岳池縣振學校崇積貯

歲旱徒跣祈禱罹疾不辭宦遊垂二十年所入俸貲悉分親族家無私藏

李啟東

楚雄縣人讀書過目成誦下筆累千餘言登嘉靖壬辰進士二甲第一歷官禮部郎中忠

鯁廉介遠近稱之

俞汝欽

楚雄縣人嘉靖丙午舉人質性清粹超然塵外居家不營產業惟以讀書明道自任山居

不履城市當事慕見言不及私惟直陳地方利弊纂修郡志皆其手筆詩文尤為清逸所著有山齊集

孫學易

楚雄縣人萬厯壬辰進士任寧國府推官斷獄無冤厯遵義道副使不畏強禦土酋奢崇

明陰懷反側易欲破其謀請於當事不果行至後猖獗騷動三省衆方服其先見擢陝西右布政使致仕歸會友講學置義倉地方事宜有不便者直陳當事閭里賴之

本朝

徐達乾

字躋庵楚雄縣人康熙癸丑進士吳三桂反脅之以官不屈堅正自守者八年及大兵平

滇巡撫王繼文疏薦授山東高苑知縣興利除弊政績甚著行取吏科給事中尋辭歸

姚安府

宋

高泰祥

高昇泰之九葉孫為段氏相元世祖軍薄大理城舉國惶惶成思蹈海泰祥獨率衆與元

將巴延巴哈和爾郭等相持彌月力不能支退至托實救兵不至及被俘不屈予以官不受殺之臨刑曰段運不回天使其然為臣死國吾事畢矣妻段氏抱孤瓊申訴世祖指其兒曰忠臣之後也善視養之命世其官

元

高明

姚安路總管天歷中入朝賜衣馬楮幣明年盜起招流離撫攜貳關汙萊還侵軼既又繕

修官舍郵傳以至民賦軍  
儲無不精究治績最著

明

劉

鈞

姚安所人成化癸卯舉人孝友純慤未第時

處候之不至又明夕復候之果一婦人來泣涕曰  
失此物為翁姑所迫葬死矣鈞持與之是年即登  
鄉薦知長壽縣分祿以及士之貧者歸里四十  
餘年不輕入市一日遇鄉飲惡其簡禮竟不赴

王鳴鳳

大姚

人萬厯間貢生幼事母以孝聞太守王

更娶鳳曰若棄此女則終身失所守益奇之因其  
貧捐俸買田以助後膺貢謁選赴京從王守仁學  
獻籌邊六策兵部奇其才除安福丞首卻常規舉  
鄉飲興水利立社倉擢知嵒嵒縣除前樊政以解

頗苛作千金堤以興水利兩邑俱祀名宦

陶希臯

字直南姚安所人從學於盱江羅近溪中萬曆癸酉舉人任石阡府推官發伏摘奸遷知

永寧州平賦役擒巨寇以剛直忤上官遷王府官歸里奉親課子疎族伯叔無後者為任喪葬鄉里有不平者解之以息訟爭修學宮捐貲倡首平差釁起軍與民交訐希臯抗論不阿幾為奸宄所中及事定而後人人德之

陶珽

姚安所人萬曆庚戌進士累官武昌兵備道正直端方歷任有聲里居賑恤族黨講學論

文士類重之

永昌府

三國漢

呂

凱字季平永昌不韋人仕郡五官掾功曹後主建興元年雍閬等聞先主殂驕黠滋甚降於

吳吳遙署閬為永昌太守永昌郡在益州之西道路壅塞與蜀隔絕而郡守更易凱與府丞王伉率屬吏民閉境拒閬閬數移檄永昌凱荅檄諭以忠義閬不聽凱恩威內著為郡中所信故能全其節三年丞相亮南征討閬既發在道而閬已為高定郃曲所殺亮至南中上表曰永昌郡吏呂凱府丞王伉等執忠絕域十有餘年雍閬高定逼其東北而凱等守義不與交通臣不意永昌風俗敦直乃爾以凱為雲南太守封陽遷亭侯會為叛夷所害子祥嗣其後子孫三世為永昌太守李雄破寧州諸呂獨不附世稱其賢

唐

楊

興

郡人蒙氏時為布變天寶八載率所部入附  
璽書褒美子孫世為永昌酋長歷段高二姓

至明洪武初兵下大理興  
後裔獻馬領所部歸附

明

丁

嵩

保山人家貧事母孝洪熙間舉懷才抱德辭  
不就宣德間詔草野直言嵩上機務八策一

曰正心術則天道應二曰重經筵則宗社福三曰  
開言路則聞見定四曰用賢才則政治美五曰總  
大綱則庶務舉六曰汰冗兵則軍儲足七曰重守  
令則邦本寧八曰崇節儉則財用足上嘉納徵之  
道病卒所著  
有橫峯樵唱

楊

元

字務本保山人潛心理學終日靜默頓悟卽子先天數學有叩之者言無不驗為諸生卒

業太學歸隱居不仕甘貧樂道從學甚衆當路重其人亟饋之無所受或封識待其去任返之所著有納甲圖九圭數學基指南行於世人稱象山先生

萬

綸

字允言金齒司人成化丁酉舉人任武岡州學正陞翰林院待詔歷官長史致仕歸内外

族黨之貧者咸周之年八十六遍辭親友旬日而卒所著有西窻集妻王氏亦有月梅軒詩集

張志淳

字進之金齒司人成化甲辰進士弘治間任吏部文選主事歷陞選郎用賢拔滯門無請

謁與天台黃元昭齊名正德初擢太常少卿提督四譯館懲入館子弟空名之弊一變舊習時論多之晉南戶部右侍郎尋致仕晚年以圖書自娛所著有南園集西銘通南園漫錄永昌二芳記諸書

年八十  
一卒

滕

檣

字秀之金齒司人成化丁未進士歷南戶部  
郎中清苦持重以親老乞歸家居淡泊不治

產業與人交平易可親非慶弔不出  
著有永昌百咏歸田錄等集

吳

璋

字廷獻金齒司人弘治己酉舉人過浙問學  
於王守仁居三年所養益粹授長壽教諭倡

明理學教人以致知力行  
學者宗之稱執齋先生

林

巖

字鍾秀金齒司人弘治辛酉舉人知鬱林州  
廉介清苦值歲荒捐俸代貧民償逋稅以內

艱歸至沙木和囊罄鄉人延為塾師資以館穀乃  
得歸及服闋不能治裝郡士高其誼助之行補賓

州卒  
於官

戈

諫

金齒司人弘治甲子舉人歷太僕丞出為湖廣僉事所至以廉幹稱會擒巨寇賚予有加

張

含

字愈光金齒司人志淳子正德丁卯舉人不樂仕進遊梁宋間為李夢陽所知深加稱賞

及歸與楊慎友善學者稱  
禹山先生著有詩文行世

張

鐘

字子鳴金齒司人正德癸酉舉人任岳州府推官摘發巨奸不屈閹宦歷南工部郎中以

疾歸居家十五年澹泊自如及卒  
惟圖書數卷士林稱西村先生

閃

鏜

字大聲金齒司人少負義氣為諸生時人有竊其二馬者知其人不發中正德丙子舉人

知鄧都縣居家不治  
產業事親以孝聞

張

合

字懋觀金齒司人志淳子十六中嘉靖壬午解元登壬辰進士任刑部主事歷湖廣副使

以疾歸性嗜學手不釋卷善書畫權貴造請輒卻之居鄉不談公府事時欲清查夷田人心洶洶乃為書五千言達之當事事遂寢所著有賁所文集

吳宗堯

字協卿騰越人嘉靖癸卯舉人歷馬湖府同知復補延平所至有賢聲終養歸嘗從湛甘

泉蔣道林遊講明正學學者宗之輯郡乘二集

邵惟中

永昌衛人嘉靖丁未進士歷官太僕寺卿在朝有聲告歸居閩里恂謹不敢上人先民

遺度

吳崧

永昌衛人嘉靖庚戌進士任刑部主事轉員外出知福州府禦寇有功陞四川副使陳情

終養創義倉置學田賑饑恤貧鄉人德之

薛繼茂

字懋敬永昌衛人少刻厲有大志登萬厯癸未進士初知孝感縣調長樂以憂歸補文安

召為湖廣道御史慷慨言天下事不少隱諱如論郊廟不親請建國本諸事語皆懇直初竝封之議神宗謀於閣臣時王錫爵以為可及旨出舉朝力爭歸咎錫爵惟繼茂一疏最和平復上書相國事得寢又疏出滇臬李材於獄旋奉命巡按貴州請增解額五人繼為怨者所中削籍歸後追錄忠直贈光祿少卿

閃繼迪

保山人萬厯乙酉舉人任吏部司務天性篤孝家法嚴正生平喜獎掖人不喜人諛漕澗

賊臨城建議主剿施甸激變建議議主撫皆中機宜鄉人立祠報德以子仲儼貴贈檢討賜諭祭著有羽岑園秋興吳越遊草諸集

王會圖

保山人萬歷癸卯舉人知鹽山縣卓異擢貴州道監察御史巡關權以直忤權璫歸

石應嵩

字澹寧保山人萬歷庚戌進士知江陵縣操持嚴毅遇事剛斷豪猾斂跡會水泛親督沙

市居民障水作堤民免昏墊以堰塞里吏議調靈寶縣礦徒數千人入其郭應嵩登城拒之賊亦登嵩手刃二人指麾力戰賊大奔撫按以聞陞南兵部主事浦口城為南都保障江水浸齧南城盡圯部檄應嵩董役應嵩議先築堤障江苦無石乃登高相山脈指一區掘之得石作堤七百餘丈督率不遺餘力初議一面當糜金錢五萬厥後三面俱新之計其工費僅四萬餘工垂成而嵩卒大司馬黃克纘與戶工二部合詞請贈卹

戈允禮

字敬輿保山人天啟壬戌進士知麻城縣弊絕風清邑人比之召父擢戶科給事中轉吏

科彈劾不避權貴忠言讜論略無回曲歷南府尹陞工部侍郎著有四書正眼知儒管見等書

閃仲儼

字人望繼迪子天啟乙丑進士歷官少詹禮部右侍郎兼翰林院侍讀學士校卜一次初

官庶常時忤魏璫矯旨削籍懷宗召為纂修日講官宸眷有加兩典棘闈一奉桐封不究其用而卒

潘嗣魁

保山人事大父孀母以孝聞置義田焚借券文行無優崇禎間行保舉法閃仲儼舉以應

詔後中丙子舉人子世臣同榜解元知萍鄉縣以廉慈稱

鶴慶府

元

高惠直

鶴慶路人為本路總管有德行衆所愛戴

明

趙

和

字達道郡人正統間貢生任貴州銅仁訓導

信愛之內艱服闋補四川建始訓導銅仁諸生上疏乞還舊任許之又外艱服滿當別補銅士又請之復報可凡三任銅仁及致仕歸生徒泣送

祀名宦後學道胡堯時榜其行於明倫堂

趙子禧

字慶夫郡人和之子天性孝友多才藝年十

秩滿試吏部第一陞南陽府同知政績甚著卒於官入臨安南陽兩地祠祀所著有碧莎蛙鳴二集

張

勉

字希安劍川人弘治戊午舉人知黔江縣有巨寇數年不能平勉饒膽略至纔彌月計擒

渠魁時督責挽運甚急民且逃散勉止之曰吾能為汝達之遂力請於上果得減徭民乃安集明年

卒於官將屬續其妻問何以歸櫬曰寄葬重慶可也士民哀之立祠以祀鄉子弟受其教者稱為龍

溪先生

陸

經

郡人弘治壬戌進士累官南兵部郎中賦性耿介貧約自如卒之日棺殮不具

趙德宏

字有容郡人正德丙子舉人事父遠以孝聞父沒京師宏哀毀骨立徒跣偕傭人肩柩以

歸既葬廬墓三年有白犬護墳馴鳥巢樹之異巡按唐龍奏聞榜其居曰孝子趙氏之門任順慶府通判有疑獄宏一訊立白遷知潼川州贖鍰悉令輸粟得粟萬八千石後歲大饑鄰邑道殣相望獨潼川得免又興建圯城民不知勞潼人為立祠祀轉慶府左長史及歸行李蕭然邑御史大節疏聞以禮存問為立孝廬坊郡人因名其里曰孝廬村

朱

珮

字鳴朝郡人正德辛巳進士任大理寺評事多平反冤獄出為貴州僉事調傳驛傳民用

以甦計縛元惡不費兵餉厯湖廣副使抑豪右增隄防陞廣東叅政值盜起設謀禦之絕其汲道皆歸降又以計畧平定交南莫登庸等陞陝西按察使乞休居鄉恂恂若未嘗有官者

楊

鑰

字啟之劍川人嘉靖丁未進士聰穎剛方不隨流俗理學為土人宗厯官工部郎中以修

孝陵勞瘁卒

彭

富

字仲禮郡人嘉靖壬戌進士知崑山縣入為戶兵二部主事出知紹興府以廉操薦異等

入覲上慰勞有加親賜聯云帝近春常在官清樂有餘厯貴州叅政按察轉四川布政使先後平李富征十寨討建越均徭役寬榷稅平出納所在以功德著陞貴州巡撫寬和鎮靜夷漢帖然尋致仕

歸蔬食敝袍恬然自適而性剛介不妄言笑有古人風

查

偉

字警偉郡人萬厯甲戌進士歷官戶部郎中出知真定府再補保寧府所至以廉明稱以

苑馬寺卿致仕歸居鄉  
謙和人咸服其雅量

吳堯弼

字宗舜郡人萬厯丁丑進士選庶常改兵部武選郎中出為貴州督學僉事嚴冒籍禁有

直指某庇其鄉人弼不可遂中傷之廷議知弼冤寢不行後補四川兵備道時安綿蕃夷滋擾弼撫御有方蕃人誓不復反民賴以安卒於官綿人祀名宦

閔宗聖

字心過郡人萬厯壬午舉人常置義田以贍族分廩讓田於友時論高之署咸陽教諭盡

心教士周恤孤寒遷知榮昌縣多惠政大工掄材采運如數民不稱擾邑有大憨人莫敢撻聖寘之

法榮人稱快會征楊應龍竭力王事卒於官聖家本裕反以官貧祀榮昌名宦

趙

捷

字習南郡人萬厯壬午舉人任宜良教諭陞國子助教出為瑞州府同知攝高安縣篆時

有文牒株連數十人羅織成獄捷止坐殺人者餘杖釋之上官不可捷力爭曰殺人雖死不為上官銜之捷既耿介不屑趨承復淡於仕進會遷長史遂致仕歸

楊

提

字漸高郡人萬厯戊子舉人知桂東縣地苦瘴人不知醫提置藥局所活甚衆邑賦歲飽

奸胥提覈其久占者三人置之法弊始絕邑故無科目子衿橫豪提教之向學士風始一變後遷西安府同知攝渭南縣及邠州多惠政秦人德之卒於官提生平讀書以體認為功其學有體用相國李標為之傳

梁州彥

郡人萬歷癸丑進士知新繁縣當路謂才浮於地尋調華陽華風稱巖劇彥到任百務俱

興每大牒片言而折以治行卓異入觀留部考選念親老乞歸養未竟厥施而卒

楊棟朝

字夢蒼劍川人萬歷癸丑進士歷官南禮科給事中值魏璫禍起屢疏抗劾不避斧鉞削

奪歸里後起補吏科遷光祿寺卿其劾璫疏載在明史與楊左爭光焉

楊芳盛

字大豫郡人萬歷丙辰進士知大冶縣有聲考選山西道御史巡按河南剔蠹鋤奸歷見

丰采視長蘆鹽政猾商斂手補京畿道適黔中奢安之叛條陳安邊諸疏廷議偉之遷太僕寺少

卿提督西路馬政多蓄息轉右通政歷應天府尹以敦大持體政績益著崇禎壬午擢南京戶部右侍郎兼都御史總督糧儲時流寇滋熾南糧飛輓不繼盛措置有方癸未告歸濟貧乏敦族閭優游

泉石閒年  
七十一卒

段高選

字讓字劍川人萬厯己未進士知巴縣有循聲天啟辛酉奢酋集兵渝州一切治辦俱選

經理比從上官點閱見酋有叛心陰令吏歸印於署與父汝元訣及奢酋猖獗衆官駭散選獨蹕踊大呼不去酋知選廉明戒勿殺選罵賊不絕口遂死於亂斧中變聞父母子女俱相繼死於署僕段黑子挺身赴演武場索選屍亦死之崇禎初賜祭葬諡恭節勅建昭忠祠祀之

楊應宿

字斗瞻郡人天啟壬戌進士歷官員外郎中挖運通州轉輸如法陋規宿槩剔釐殆盡出

知成都府百務自裁苞苴頓絕深獲士民心以內艱哀毀骨立匍匐間闕歸尋卒

陳奇猷

字襄宸劍川人天啟壬戌進士性長厚為諸生時拾遺金歸其主授中書掇御史疏陳滇

事極中肯竅視節慎庫以清慎聞因  
彈主政貪穢為所擠落職歸道卒

順寧府

明

猛

蓋

郡人世襲土知府恩  
威竝濟土人懷之

猛

卿

字堯佐郡人通書史世襲土  
官嘉靖丁亥以武功賜鉞幣

永北府

明

庫齊巴哈

父布圖格濟仕元為永寧知州洪武間八  
合領兵歸順永樂丙戌論西番入朝上嘉

之陞永寧為府賜鍍花金帶  
鐫四字曰克篤忠誠世其官

# 麗江府

元

麥

良

父宗見方技良世祖時為察罕章管民官從  
克大理擒段興智功居烏蘭哈達之右以副

元帥佩虎符鎮麼些又破鐵橋城華  
馬國加授銀印為提調諸路長官司

明

阿

得

郡人元時麗江宣撫司副洪武十五年兵下  
雲南率衆歸附賜姓木十六年開設府治授

麗江知府會西番劫瀾滄江得引兵卻之又從指  
揮董某破石門關寨命世襲土知府征巨津擒阿

奴聰斬偽元帥朱保屢著勞績  
後卒于初襲從征麓川有功

羅

克

蘭州人仕元為萬戶洪武中率衆來歸以軍功授土知州其孫羅牙從木初征伯刀于孟

屢著

戰功

木

增

阿得八世孫萬厯間襲知府值北勝州構亂增以兵擒首逆高蘭三殿鼎建輸金助工兼

陳十事下部議可朝廷喜其忠誠特加叅政秩增  
又好讀書博極羣籍家有萬卷樓與楊慎張含唱  
和甚多

蒙化府

明

左

伽蒙舍人永樂中襲知州後從征麓川戰于大侯功第一陞臨安知府仍掌州事正統間陞

州為府遂以伽為知府

丁

景

字德輝蒙化衛人成化戊戌進士歷官武選司郎中出知石阡府先是苗叛學官府治壇廟郵傳倉廩盡成灰燼景以次修復設鐘鼓警昏夜賑民恤士收輯流亡卒於官有烈風星殞之異

櫬歸囊橐蕭然惟遺稿數卷而已

劉

揮

字本忠蒙化衛人貢生任雅州訓導恂恂雅飭學問淵宏彌渡市舊不知學揮開館教讀

竝講明冠婚喪祭之禮風俗一變

雷應龍

字孟升郡人正德甲戌進士知蒲田縣條行八禁皆切時宜時巨璫督貢方物甚橫力折

之均徭平賦築堤堰毀淫祠大愜民心擢御史奉  
勅巡鹽兩淮政暇引諸生講正學江都祠堂久圯  
檄有司新之因災異疏八事曰務實學親大臣放  
官人去無益正禮教改編發宥罪謫均賦役上嘉  
納之尋有中貴乞織造得請公手疏  
極論不報憤鬱成病卒於揚州官署

### 本朝

張芳譽

郡人順治間貢生居心仁慈樂善好施力行  
不倦年逾七十猶手錄格言傳播遠邇雖嚴

冬酷暑誦讀不輟康熙庚戌士民公舉德  
行督學壽以仁旌曰德隆望重壽八十卒

李士奇

郡人貢生制行端方宅衷謹懋康熙癸丑吳  
逆叛脅之以官力辭不受操守堅確至老弗

移

忠烈

雲南府

明

李

葆

昆明人洪武間以軍功授前衛守禦千戶永樂間從黔國公進征安南有戰功後復征交

趾與賊鏖戰於大安海口矢石俱盡挺戈刺賊大呼報國遂陷陣死

程世勲

昆明人後衛百戶嘉靖間官兵討鳳繼祖世勲護餉至金沙江因令督偏師出哨至波羅

結堡猝值賊衆力戰死子道南以孝聞

朱朝冠

字子儀嵩明人嘉靖壬子舉人歷漢中通判督兵征何勉屢戰皆捷賊火焚營朝冠往救

焚死

徐朝綱

晉寧人萬厯庚子舉人厯安順府推官會水西賊攻城誓衆堅守城陷被執不屈闔門被

害

唐俊德

舉人

周之麟

生員

陳宰

百戶

李印

土官

俱祿

豐

萬厯間賊

攻掠縣城德等血戰被殺

汪文度

宜良所世襲指揮天啟間猱賊犯城文度往禦被刺腸出仍奮武擒賊斬之城賴以完

程坤

昆明人武進士天啟間官四川總兵中軍會西路為賊梗率兵赴援至畢節城陷被執不

屈死

余士泰

昆明人天啟甲子舉人任石阡府推官上計次襄陽值張獻忠寇亂城陷死之

劉惟馨

昆明人天啟丁卯舉人任陝西郿州知州值流寇圍城率衆拒守城陷罵賊亂刺而死

司

慎

昆明人沐天波叅隨定洲反先假稟辭襲天波直入府第慎叱之定洲解衣露甲抽佩刀

率衆排闥入慎力拒被刀斷胸而死

向

六

馬

三

俱昆明人沙賊反陰約敢死士十人書報國宇為號共圖賊不克俱

殺被

劉

撫

昆明人任戶部主事為閩賊所執三木橫加折一足未死歸至滇流寇使人招之授以督

學撫曰京師不死已無面目見先皇豈復為賊官耶大罵而死

李兆旂

昆陽人崇禎間貢生任廬江訓導流寇圍城兆旂守北門城陷被執不屈罵賊死

羅銘鼎

三泊人崇禎庚午舉人歷官四川威茂兵備道攝按察使篆值流寇張獻忠犯川拒賊守

城及城陷被執不屈罵賊而死妻段氏攜三子兆鶴兆桂兆昌俱投水死

楊永言

昆明人崇禎癸未進士知崑山縣嚴明有治聲流寇破城巷戰而死

沐天澤

黔國公天波弟任都司明末沙賊叛率兵巷戰被執不屈死之

陳大經

字爾至昆明人少慷慨有才略善騎射兩中武舉沐天波延與贊畫吾必奎叛大經典大

西門防守及沙賊之變沐天波倉皇走城上欲出亡大經叩馬諫曰尚有日月營兵在殺賊不勝行未晚也時奸人干錫朋隨天波每陰為沙賊地忌之以目視天波天波反疑其見誘抽刀殺大經而

去

徐高遷

沐天波裨將沙賊陷城遷將糾衆援剿而人無鬪志知事不可為闔家閉門自焚死

黃恩

右衛人百戶沙賊陷城率家丁數人巷戰連殺數賊以衆寡不敵為賊所殺

陳爰謀

昆明人萬厯壬子舉人原任知府致仕家居沙賊破城逼欲用之不屈而死

李開芳

富民人貢生沙賊破城潛出乞援知事不濟同生員王朝賀縊死於松華壩

劉昌應

右衛人武進士明末為叅將流寇入滇倡義起兵屢與賊戰被執不屈死之

向琪

向宸

俱左衛人百戶聞流寇至琪一家十六口皆縊死宸亦闔門自焚

王來儀

字仲威昆明人萬厯庚子舉人任吳縣教諭厯官應州知州性耿介與上官不合歸甲申

聞變門人王錫家督師赴難儀涕泣相對勉以忠孝丁亥流寇入滇罵賊而死

蔣薦

前衛人百戶聞流寇至一家七口俱自縊死僅存一子

施于京

昆明人貢生員流賊破城闔門自焚

譚三謨

昆明人貢生任臨安府教授歸流寇破城闔家自縊

張如良

昆明人貢生持已清慎流寇之亂良與子景輝景輝及妻媳一門俱殉節死

莫貴德

宜良人子可及靖州知州流寇屠城謂妻麻氏曰子受國恩身蒙寵錫當以身殉同赴井

死

朱荃

安寧人孝行純篤隨父化孚官江南不忍歸後娶歸值丁酉王自奇之亂荃寓趙州不屈

而死

薛大觀

字爾望昆明人與子之翰俱有才名戊戌雲南潰兵肆掠舉家至城北龍泉觀慷慨賦詩

妻女皆誓同死以金授僕令他往僕哭曰主死奴輩寧忍獨生相率赴龍潭死數日屍浮水面七人

牽聚

一處

單武襄

昆明人貢生戊戌遇潰兵闔家舉火自焚書於門曰一門完節

本朝

楊思義

昆明人流寇入滇聞田主嚴賓闔家殉節與妻陳氏投井死

楊樹烈

昆明人任四川南川令致任歸流寇潰兵屠掠舉家倉皇奔避烈獨置香案著衣冠北面

再拜自縊死逾月家  
人還視面色如生

曲靖府

明

趙

俸

馬龍所千戶嘉靖間  
安銓之亂力戰死

趙

愷

尋甸人性行誠樸為鄉里所重安銓叛攻城  
愷率衆拒之城陷舉家登樓自焚死知府劉

槐即其居址  
為祠祀之

諸藩裕

尋甸守禦所指揮萬厯間大理保作難藩裕  
與千戶戚貴卿陳萬國土舍資有能皆赴敵

之死

李仲武

鳳梧所軍萬厯間從指揮諸藩裕征東川已擒土酋賊復劫營仲武遂力戰死有司勒碑

表之

李加培

平彝衛指揮天啟間從叅將尹啟易討霑益諸夷死於陣

曹三捷

平彝衛指揮僉事天啟間平彝諸蠻亂陷城官吏士民皆逃竄獨三捷與賊戰死

邵元齡

陸涼人世襲指揮有能名明末沙定洲作亂其黨趙應元攻陸涼城陷罵賊不屈而死

尹大任

陸涼人崇禎末任定番州學正孫可望入寇城陷謂家人曰明倫堂我之西山也冠帶謝

祖考徐步出拜北闕遂自縊

臨安府

明

王

綸

臨安衛人永樂間擊黎賊有功陞正千戶鎮守蒙自後復從征黎賊陷伏中死之

葉

晟

臨安衛後所百戶正統間從征上江奮勇殺賊歿於陣

邵

謙

臨安衛左所百戶正統間征上江有功後攻馬鞍山戰歿

孫

華

臨安衛前所百戶成化間撒甸夷亂從征勇敢赴鬪歿於軍

王

保

建水人勇力殺土賊剿叛兵屢立戰功後禦賊戰死土人祀之

劉大經

石屏人充寶秀義勇兵嘉靖間調征武定鳳賊遇伏力戰被執賊支解之

周尚懷

石屏人野賊肆行劫殺尚懷奮勇捍賊戰於老衛寨被刺而死

范印華

建水人天啟間以征安効良授遊擊崇禎間土酋普名聲叛守城力戰屢破賊兵加叅將

後復領兵誘賊機洩被執不屈死之

楊國彥

阿迷人生員普名聲叛國彥以義勵鄉民禦之為賊所害

史觀宸

石屏人崇禎癸酉舉人知南充縣多惠政值土賊姚黃亂率衆拒之多所斬獲以功擢知

順慶府賊復引張獻忠入攻順慶力禦被執罵賊而死

楊一忠

河西人貢生崇禎間任巴縣教諭流寇攻城分門拒守城陷罵賊被害子名嗣伏屍哭亦

被殺

耿廷錄

河西人天啟甲子舉人仕至四川巡撫以討流賊為史可法所重丁艱歸流賊陷河西死

之

激江府

三國漢

李

球

俞元人李恢姪也任羽林右都督隨諸葛瞻拒鄧艾臨陣授命死於綿竹

武定府

明

楊忠惠

和曲人生員嘉靖間鳳繼祖叛軍門議招降賊營以散其黨無敢前者忠奮義請行賊執

之不屈罵賊而死

金守仁

武定守  
禦指揮

王應爵

魏守恭

梅應時

黃桂

俱千

金榮高

鎮撫

楊應祖

陳

宰

俱百

董漢英

生員

戶

以上諸人俱死萬厯丁未阿克之難御史鄧漢疏稱其或効死封疆或捐軀行陣或延頸待刃或閤門被屠抱恨黃泉血濺萑弘之碧銜冤五夜聲哀望帝之魂例當廕叙以慰忠貞

## 本朝

徐升曜

元謀人副將奉遣往蜀招撫王屏藩欲降之不屈被害贈左都督

賜祭葬

## 廣西府

明

楊廷瑚

彌勒人貢生慷慨好義嘉靖閒率鄉兵助知府郭集禮討夷賊阿旦奮勇致敵死之

楊令聞

彌勒人廩生普名聲之亂罵賊而死

何天衢

字升宇三鄉城人有勇略普名聲招為頭目使駐三鄉後名聲謀逆擬三路出兵會戰省

城因遣銳手三百名促天衢由維摩羅平一路天衢慨然曰此丈夫報効朝廷時也豈可與賊反耶

遂抗諸銳手率先歸順維摩署州事李嗣泌開城納之時名聲已陷彌勒聞天衢反正患在心腹急

撤兩路兵歸巡撫王仇題其功授叅將捍禦普逆累功陞都督同知名聲怒甚自攻天衢名聲中砲

死其妻萬氏復攻之天衢勢孤糧盡自刎死

元江府

本朝

康天錫

郡人任本營把總雍正十年猱賊叛禦于他即奮勇先登死之

張文秀

新平人任新營營把總分防揚武壩猱賊叛率兵堵禦力屈被殺以上二人事聞俱

賜祭葬贈廕

賞卹

大理府

明

董寶

大理人南詔清平官董成之後洪武間任順寧土經歷清慎勤敏部民安之後以功遷大

理土經歷麓川之役多著功能以死事論祭

尹夢鰲

太和人萬歷乙卯舉人崇禎間官潁州知府流賊破城死之

趙興基

太和人貢生崇禎間任廬州府通判流賊陷城基肅衣冠縊於城樓

尹夢符

尹夢旗

馮大成

俱太和人丙戌沙賊亂同舉義討賊為所執俱

罵賊死夢符支解尤慘

高拱極

太和人孝友持躬風節範俗沙賊破城投池而死

楊士俊

太和人沙賊破城同母及妻妹俱自焚死

楊憲

太和人廩生居家孝友持已端方沙賊攻城憲倡義拒守城破積薪樓下率妻女等七人

次第縊死令舉火焚樓弟婦及女竝孀李孔昭亦  
移火別室自焚學使謝于道旌曰禦寇則百口登  
陴殉難則一門全節  
宜載志乘以薦馨香

張景仲

太和人生員沙賊破城死於  
學宮妻女三口皆投井死

楊毓華

太和人生沙賊破城死於學宮  
弟時華振華母妻一家焚死

李嗣淳

太和人生平負氣沙賊  
破城投五印菴池水死

楊

珥

太和人生貢生沙賊之難  
作絕命歌罵賊而死

李

褒

太和人生員賦性剛方沙  
賊破城被執不食七日死

宋應奎

馬斯龍

張相業

皆太和人生員沙賊破  
城著冠服死於學宮

王寧

太和人增生沙賊破城正冠服坐中庭罵賊而死同時諸生陳捷尹亮工蘇昇楊大鴻胡

康尹弘載李元鳳張書紳楊先鼎等殉難者又數十人

陳正

大理衛應襲指揮年十八沙賊圍城屢率衆出殺賊城破猶巷戰手刃數賊力屈死之

陳誨

大理衛守備謀勇兼擅武藝絕羣沙賊攻城分守東門城陷奮力格殺賊數十人而死

關維翰

大理衛千戶沙賊攻城分守西北隅城陷力戰殺數賊而死刀猶在手子太忠死其側

楊昌印

王象乾皆大理衛千戶沙賊破城率妻子闔室焚死

鮑洪

大理衛世襲指揮千戶沙賊破城洪率妻女家人閉戶自焚死

楊淇

雲南縣土官沙賊叛被執嚙指血書儿曰吾寧死不從賊繫至省城不屈死之

楚雄府

明

王用之

鎮南人監生宣德間任交趾慈廉州知州遇  
交人叛用之執節不屈被殺後同何忠等贈

恤

吳繼勲

楚雄衛指揮使勇智絕倫萬厯間督軍征緬  
屢戰屢捷緬人恨之孤軍深入陷歿事聞賜

祭

陳士性

楚雄縣人選貢崇禎間任  
冀州州同流寇陷城死之

丁師義

楚雄縣人選貢崇禎間知霸州值羽書交集  
竭力戰守城陷被執慷慨殉難贈布政司叅

議

謝

琯

楚雄縣人崇禎癸酉舉人任四川遵義府推官以廉幹稱擢遵義兵巡道適流寇攻城琯

戰敗被執不屈賊下令屠城琯曰苟止殺吾當從汝賊許之遵人獲免賊迫與偕行至貴陽自縊於

學宮

包洪策

廣通人崇禎己卯舉人知新都縣至任甫四月流寇至力守孤城食盡城陷不屈死之

杜天正

字端先楚雄縣人崇禎己卯舉人少負忠義沙賊攻楚雄同副使楊畏知協守後畏知往

禦流寇於獅子口敗績城中无解天正書城樓壁曰滿城鼠竄恨滇南無一赤心男子千秋電火求

後世免一青史罪名至西城樓正衣冠自縊

王承憲

楚雄衛世襲指揮中武舉授遊擊為楊畏知前鋒沙賊攻楚守具皆其幹理賊去而復至

承憲將中軍往禦土司那崙等翼之賊陰通土司故黨及戰左右翼不至憲知中計大呼手殺數十人身中流矢與弟承頊俱戰死

張朝綱

廣通人貢生崇禎間任沅州州同致仕家居明末流寇至廣通網語妻馮氏曰曾受國恩

何顏對賊因同妻序左右而縊子廩生張耀慟絕復甦葬親後亦自縊死

王家祥

楚雄縣人廩生流寇入城闔家二十九口皆赴水死

姚安府

明

高

棟

姚州人土舍弘治癸亥普安賊叛棟偕大理指揮唐永擊之奮勇殺賊十餘人追至板橋

驛遇伏隻身還戰中十數鎗死  
巡撫嘉其義勇以禮歸葬之

高

鵠

姚州人土舍多謀幹善騎射嘗分捕諸夷俱斂跡不敢為盜嘉靖辛亥元江那鑑之變布

政使徐樾遇害鵠奮身赴救死之事聞優卹其後

李師泌

姚州人武生土逆吾泌奎叛楊畏知任楚雄監軍道委師泌協守楚城後必奎破城師泌

被執不屈賊置鏑於前以脅之師泌罵曰大丈夫肯降賊耶以頭就鏑賊怒先鏑其足斷而為三士

民哀之  
為立祠

席上珍

姚州人流寇入滇上珍與知州何思固守姚安城孫可望命張虎領兵攻之城破上珍被

執不屈賊剝其皮  
至頸罵聲不絕

## 永昌府

明

張化樞

永平人天啟甲子舉人知無為州流賊攻城極力守禦城陷不屈罵賊而死事聞詔祀忠

烈祠

李君植

瀾滄衛指揮因公務領軍百餘人入大理值沙賊圍城植四面應敵城陷力戰而死其下

百餘人  
俱死之

石聲和

保山人生員崇禎間刑部郎中王國治舉應孝廉丁亥流寇入城聲和與子生員吉皆死

之

馬生

保山人生員失名丁亥流寇至惡少爭焚香迎之生獨閉門縱火舉家自焚死

張登元

字文蔚保山人生員丁亥兵至與妻潘氏謀自焚乃誘二子出遂舉火男婦共死者七人

劉德本

保山人素行忠正丁亥兵至積薪樓下夫妻子女五口俱焚死

祝維霍

保山人生員文行兼優為塾師賢士多出其門丁亥流寇之亂偕妻子三人投井而死

陳正猷

保山人生員丁亥兵變偕妻避於東山兵至妻先投水正猷自縊

王景昌

保山人貢生丁亥兵至同妻赴東河死

鶴慶府

明

李繼兒

鶴慶前所百戶正統辛酉從征麓川力戰死  
子韓痛父死奮入賊營亦死事聞遣官諭祭

贈繼兒武略將軍副千戶韓忠顯校尉  
管軍千戶鎮撫仍錄其子孫優卹賞賚

順寧府

明

尹良輔

郡人萬厯間領兵攻定  
善寨敵勇當先歿於陣

黎雍熙

黃文達

俱雲州人明末本郡枯柯土司蔣  
朝臣叛攻州城雍熙固守拒賊出

戰陣亡文達  
亦同時戰死

蒙化府

明

左重

郡人萬厯甲午舉人丰標卓偉尚名節天啟間知灌縣慈廡明斷會奢崇明反圍成都城

數匝城中堅守望援重圍變榜示所部謂灌去省咫尺且北控吐蕃首尾受敵不若鼓行入省兩全而有功邑人聽之遂肅隊薄城賊釋圍接戰重死鬪力竭馬蹶罵賊而死事聞贈光祿卿建祠崇祀于廕衛千戶

陳于宸

字葵若郡人萬厯丁未進士知巴縣致仕居家沙賊陷城死之

周二南

字汝為郡人貢生天啟間任長沙府通判陞知岳州府以士民遮留改陞本府知府闖賊


犯瀏陽二南率兵禦之鏖戰竟日後軍不繼  
遂死於陣事聞贈太僕寺卿蔭子入監

左廷臯

字對揚郡人崇禎庚辰  
進士沙賊破城死之

陳懷瑾

字輯瑞郡人生員沙賊攻城  
登陴守禦城陷不屈死之



雲南通志卷二十一之一